

Умр - ўткинчи, хотира - абадий



09:31 / 03.12.2018 2669

Жорий йилнинг 2 декабрь куни Тошкент вилояти Паркент туманидаги Паркент тадбиркорлик ва хизмат қўрсатиш касб-ҳунар коллежида “**Умр - ўткинчи, хотира - абадий**” шиори остида колледж ва мактаб ўқувчилари орасида математика фанидан V очик олимпиадаси бўлиб ўтди. Мазкур олимпиада фазилатли Шайх Муҳаммад Содиқ Муҳаммад Юсуф роҳимаҳуллоҳ ҳазратларининг хотираларига бағишлаб ўтказилди.



Тадбирда халқ таълими соҳаси вакиллари, математика фани ўқитувчилари, коллеж ва мактаблар ўқувчилари ҳамда эксперталар иштирок этишди.

Ўзбекистон халқ шоири Маҳмуд Тоир ҳамда Ислом Муҳаммад Содик олимпиада меҳмонлари бўлишди.

Олимпиада шартлари бошланишидан аввал, тадбирда сўз олганлар математика фанининг тарихи, ривожланиш босқичлари ва истиқболлари, ушбу фанни самарали ўқитишининг замонавий ва илғор услублари, ёш математикларнинг имкониятлари, ютуқ ва камчиликлари, математикани ўрганишининг сир-асрорлари, унинг муҳим ва қизиқарли жиҳатларига тўхталиб ўтишди.

Қизиқарли ва таассуротларга бой баҳсда Тошкент вилоятидан 67 та коллеж ва 56 та мактабдан ўқувчилар иштирок этишиб, математика фанидан ўз билимларини синашди.



- Математика кўплаб соҳаларда, жумладан, инсоннинг кундалик турмушида доим керак бўладиган муҳим фандир, - дейди Ўзбекистон халқ шоири Маҳмуд Тоир. - Ушбу тадбирда ўқувчиларнинг фаол иштирок этаётганини кўриб, Ўзбекистон ёшларининг билимга чанқоқ, интеллектуал салоҳияти юқори эканига яна бир карра ишонч ҳосил қилдик.
- Математикани ўрганиш, турли масалаларни ечиш жону дилим, - дейди олимпиада ғолиби Баҳодир Пардабоев. - Олимпиадада қизиқарли

машқлар, викториналарда иштирок этиб, математика фани бўйича ўз билимимни янада ошириш имконига эга бўлдим.

Тадбир сўнгигида ғолибларга диплом ҳамда Шайх Муҳаммад Содик Муҳаммад Юсуф роҳимаҳуллоҳ ҳазратларининг асарлари топширилди.



